

Proclamacion di Carnaval 47 di Prins Compa y Pancho Nashi



Tradicion ta marca cu e mandatario mas halto di nos pais ta haci entrega di yabi na Prins y Pancho como simbolo di traspaso di mando durante temporada final di Aruba su Carnaval. Tal ceremonia a tuma lugar ayera, Diadomingo mainta na sede di Gobierno na Oranjestad. Prins & Pancho ta tuma e oportunidad aki pa realiza nan Proclamacion di Carnaval 47 den cual nan ta expresa varios deseo den representacion di e pueblo Carnavalesco di nos isla. Ata'ki e parti di e proclamacion di Prins Compa y Pancho Nas. Considerando cu durante 47 aña su Carnava ta ser manteni cu un fama sin igual ron mundo, pa su splendor, fantasi colorido, talento di creacionnan artistico y cultura ta proclama:

1. Cu entrante awe, base central di administracion di Carnaval di Aruba lo ta den Furniture Outlet Center; nos despacho di gobernacion den spreekkamer di La Salle College y nos ministerio militar Carnavalesco lo ta estableci den Watergate.

2. Como cu Prins & Pancho a sufri hopi na momento di nan coronacion, nos gobierno lo encarga DTI pa controla tur corona di Reina y monarcanan di Carnaval pa nan ta liber di feneta y prekke.

3. Durante henter periodod di Carnaval, tur stranhero residencia na Aruba ta obliga di entrega na DOOV cierto suma di divisa di nan pais pa wordo hinca den trofeo di Rey di Calypso y Roadmarch pa e trofeo haya mas peso.

4. Como cu Asoma ta keha cu bandanan no tin suficiente ekipo di sonido y cu huurmento di sonido ta mucho costoso, lo encarga FOL (Flying Over Land) pa bula riba ruta di Carnaval durante parada y suministra sonido suficiente di su motornan.

5. Pa tene nos isla liber di desgracia di trafico, nos gobierno di Carnaval lo construi un tweebaansweg 300 meter riba lama rond di nos isla. E carretera aki lo ta prohibi pa polis; caminda lo no tin control di velocidad; riba cual tur esnan bao di influencia por corre libremente y cu ademas lo no tin vangrail.

6. Pa evita cualkier incidente entre coleganan den Cuerpo Policial lo kita tur arma di efectivonan policial. Travesuras y Pinocchio lo suministra cada polis un ekipo completo di paintball pa nan tira riba otro.

7. Pa evita consumo di mas di alcohol y bebidanan artificial, nos gobierno lo institui un ministerio nobo. Entrante awe lo nombra un minister di juiceticia.

Por ultimo tur señorita den parada di Carnaval lo ricibi gratuitamente di Setar un primo, pa controla cu kende nan prima ta fiesta canto di ruta di parada.

Conclusion: Pa Aruba su Carnaval keda semper manteni como e Carnaval mas precioso na mundo, y pa sigui lucha exitosamente contra tur locual ta negativo pa nos salud y seguridad; evitando crimen, uso y maluso di droga, malesa di virus mortal y mantene nos dignidad, cu respet, decensia y bon moral durante Carnaval;

Pancho Nashi ta haya e orden obligatorio pa como su deber primordial ehecuta e decreto aki y manda copia via e-mail, hotmail y windmill pa tur skina di mundo, manera el a ser formula y presenta.

Duna y firma riba parabool di Setar y seya den potchi na fabrica di ijscream di Companashi e di 11 dia di e di dos luna di aña di Carnaval 47, 2001.